

Z A K O N
O RAČUNOVODSTVU I REVIZIJI U BRČKO DISTRIKTU BiH

Na osnovu člana 23 Statuta Brčko distrikta Bosne i Hercegovine («Službeni glasnik Brčko distrikta BiH», brojevi 1/00, 4/00, 7/04, 20/05 i 24/05), Skupština Brčko distrikta BiH na 23. sjednici održanoj 22. decembra 2005. godine, usvaja

ZAKON
O RAČUNOVODSTVU I REVIZIJI
U BRČKO DISTRIKTU BOSNE I HERCEGOVINE

I. OPĆE ODREDBE

Član 1

Ovim zakonom uređuje se materija iz oblasti računovodstva i revizije koja se primjenjuje na privatna i javna preduzeća, preduzetnike i na sva pravna lica koja su kao takva registrovana u skladu s posebnim propisima Brčko distrikta BiH (u daljnjem tekstu: Distrikta), podzakonski akti koje donosi gradonačelnik na prijedlog Odjeljenja za budžet i finansije, kao i akti profesionalnog tijela u oblasti računovodstva, finansijskog izvještavanja i revizije.

Član 2

Pojmovi upotrijebljeni u ovom zakonu imaju slijedeće značenje:

- a) **Računovodstvo** – informacioni sistem koji procjenjuje, obrađuje i saopštava finansijske informacije, koje imaju vanjski karakter, a odnose se na pravna lica i preduzetnike.
- b) **Knjigovodstvo** – podrazumijeva evidentiranje, klasifikovanje i sumiranje poslovnih transakcija preduzeća i čuvanje originalne poslovne dokumentacije, koja pruža dokaze o ovim transakcijama.
- c) **Komisija** - Komisija za računovodstvo i revizijske standarde BiH (u daljnjem tekstu: Komisija), formirana u skladu sa Zakonom o računovodstvu i reviziji BiH («Službeni glasnik BiH», broj: 42/04) (u daljnjem tekstu: Zakon BiH).

- d) **Certifikat** – javni dokument kojim se dokazuje da je lice položilo ispite i steklo odgovarajuće stručno zvanje, kao i pravo na punopravno članstvo u profesionalnoj organizaciji.
- e) **Licenca** – javni dokument koji predstavlja dozvolu za rad licu ili preduzeću. Licenca se izdaje na određeno vrijeme i njen produžetak zavisi od poštovanja pravila profesionalnog tijela, a posebno od zadovoljavanja kriterija kontinuirane profesionalne edukacije definisane ovim zakonom, Međunarodnim obrazovnim standardima, te drugim podzakonskim aktima.
- f) **Certifikovani računovodstveni tehničar** - lice kojemu je certifikat izdalo profesionalno tijelo u skladu s članom 6 ovog zakona.
- g) **Certifikovani računovođa** - lice kojemu je certifikat izdalo profesionalno tijelo a u skladu s članom 6 ovog zakona.
- h) **Ovlašteni revizor** – lice kojem je gradonačelnik izdao licencu na prijedlog Odjeljenja za budžet i finansije, nakon što mu je certifikat izdalo profesionalno računovodstveno tijelo u skladu sa ovim zakonom.
- i) **Standardi** – računovodstveni standardi i standardi revizije, prateća uputstva, objašnjenja, smjernice i načela profesionalne etike iz člana 3 ovog zakona koje je objavila Komisija, a koji su obavezni za cjelokupnu računovodstvenu profesiju Distrikta, u skladu sa Zakonom BiH.
- j) **Profesionalno tijelo** – nevladino, dobrovoljno profesionalno udruženje u Distriktu, koje je priznato kao značajna profesionalna računovodstvena organizacija dobre reputacije i koje ispunjava uslove koje je propisala Komisija.
- k) **Računovodstvena profesija** – profesija koja pruža računovodstvene, revizorske i srodne usluge u Distriktu i BiH.
- l) **Javna odgovornost** – pravno lice se smatra javno odgovornim, ako ispunjava bilo koji od sljedećih kriterija:
- a. Ukoliko podnosi, ili je u postupku podnošenja, svojih finansijskih izvještaja Komisiji za papire od vrijednosti ili nekoj drugoj regulatornoj organizaciji, radi emitovanja bilo koje vrste finansijskih instrumenata na berzi ili drugom organizovanom tržištu;

- b. Ukoliko drži sredstva u svojstvu ovlaštenog povjerenika široke grupe vanjskih lica, kao što su banke i druge finansijske institucije, osiguravajuće kompanije, penzioni fondovi, brokери ili dileri papira od vrijednosti, privatizacioni investicioni fondovi, zatvoreni i otvoreni investicioni i drugi fondovi;
- c. Ukoliko ima godišnji prosjek veći od 50 zaposlenih, godišnji prihod veći od 2.800.000 KM, prosječna vrijednost imovine na početku i na kraju poslovne godine veća od 1.400.000 KM i ukoliko su ispunjena najmanje dva prethodno navedena kriterija.

II. STANDARDI I PRAVILA

Član 3

Računovodstveni standardi, pravila i standardi revizije

Računovodstveni standardi koji se primjenjuju u Distriktu su:

1. Međunarodni računovodstveni standardi (IAS), Međunarodni standardi finansijskog izvještavanja (IFRS) i Međunarodni računovodstveni standardi za javni sektor (IPSAS).
2. Prateća uputstva, objašnjenja i smjernice koje donosi Odbor za međunarodne računovodstvene standarde (IASB).

Standardi revizije i načela profesionalne etike profesionalnih računovođa i revizora koji se primjenjuju u Distriktu su:

- a) Međunarodni standardi revizije (ISA);
- b) Kodeks etike za profesionalne računovođe, i
- c) Sva prateća uputstva, objašnjenja i smjernice koje donosi Međunarodna federacija računovođa (IFAC).

Standardi iz ovog člana također obuhvataju ostale standarde, uputstva, objašnjenja, smjernice i načela koje IFAC i IASB donesu i nakon stupanja na snagu ovog zakona,

i koje Komisija potom prevede i objavi.

III. KOMISIJA ZA RAČUNOVODSTVO I REVIZIJU BiH

Član 4

Nadležnost Komisije

Komisija koja je osnovana na nivou BiH u skladu sa Zakonom BiH, nadležna je za obavljanje slijedećih aktivnosti:

- a) prevodi i objavljuje standarde, prateća uputstva, objašnjenja, smjernice i načela profesionalne etike iz člana 3 ovog zakona;
- b) utvrđuje kriterije i donosi jedinstveni program obuke, testiranja, certifikacije i licenciranja za sva zvanja u računovodstvenoj profesiji, koji u potpunosti treba da bude usaglašen sa standardima i smjericama IFAC-a i koji se primjenjuje u Distriktu i nadgleda njegovo sprovođenje u Distriktu;
- c) nadgleda sprovođenje jedinstvenog programa obuke za sticanje kvalifikacija u računovodstvenoj profesiji, i u saradnji s profesionalnim tijelima i davaocima usluga obuke, izdaje obavezna uputstva koja su potrebna za pravilnu i jednoobraznu primjenu tog programa u Distriktu;
- d) uspostavlja, u skladu sa Zakonom BiH, jedinstven program testiranja kandidata za računovodstvenu profesiju, i sprovodi taj program u Distriktu;
- e) nadgleda certifikaciju koju vrše profesionalna tijela, u smislu ispunjavanja uslova u pogledu odgovarajuće obuke, položenih ispita, edukacije i praktičnog iskustva;
- f) nadgleda proceduru certifikacije i licenciranja članova računovodstvene profesije u Distriktu;
- g) održava redovne konsultacije radi kontrole primjene standarda, sprovođenja

jedinstvenog programa sticanja kvalifikacija i ostalih povezanih pitanja.

IV. NADLEŽNOST GRADONAČELNIKA, ODJELJENJA ZA BUDŽET I FINANSIJE I PROFESIONALNOG TIJELA

Član 5

Odjeljenje za budžet i finansije je odgovorno u skladu s članom 6 ovog zakona, za kontrolu računovodstvene profesije i licenciranje revizora.

Odjeljenje za budžet i finansije, na prijedlog profesionalnog tijela, propisuje bilansne sheme, saglasno Zakonu BiH.

Profesionalno tijelo je dužno da donese propise, kojima se uređuje ulazak u računovodstvenu i revizorsku profesiju, kvalifikovanje i profesionalni razvoj računovođa, finansijskih eksperata i revizora, kontinuirana edukacija, kontrolu kvaliteta svojih članova, izdavanje, suspenziju i oduzimanje licenci, u skladu sa odredbama člana 6 ovog zakona.

V. ZVANJA I KVALIFIKACIJE

Član 6

Zvanja, testiranje, certifikacija i licenciranje

Ovim zakonom se propisuju tri zvanja u računovodstvenoj profesiji Distrikta:

- Certifikovani računovodstveni tehničar (u daljnjem tekstu: CRT);
- Certifikovani računovođa (u daljnjem tekstu: CR) i
- Ovlašteni revizor (u daljnjem tekstu: OR).

Testiranje kandidata za zvanja iz stava 1 ovog člana, izdavanje certifikata uspješnim kandidatima i licenciranje (izdavanje dozvole za rad) vrše:

- a) Testiranje kandidata za CRT, CR i OR vrši Komisija. Testiranje kandidata se vrši na osnovu jedinstvenog programa kako je utvrđeno Zakonom BiH, a koji je u cijelosti usaglašen sa standardima i smjernicama IFAC-a. Komisija može prenijeti aktivnosti vezano za administraciju testiranja, na jedno ili više profesionalnih tijela, pri čemu će Komisija pobliže nadgledati sprovođenje tih aktivnosti.
- b) Izdavanje certifikata za CRT i CR vrši profesionalno tijelo pod nadzorom Komisije. Izdavanje certifikata za OR vrši Komisija.
- c) Licenciranje CRT i CR koji pružaju nezavisne računovodstvene usluge trećim licima vrši profesionalno tijelo. Licenciranje se ne vrši za CRT i CR koji obavljaju računovodstvene poslove za interne potrebe preduzeća i ostalih lica. Licenciranje OR vrši gradonačelnik na prijedlog Odjeljenja za budžet i finansije. Reviziju u Distriktu mogu vršiti samo lica koja posjeduju odgovarajuću licencu izdatu u Distriktu, a revizorske izvještaje mogu davati samo preduzeća koja imaju odgovarajuću licencu za rad izdatu u Distriktu.
- d) Odjeljenje za budžet i finansije vodi evidenciju, odnosno registar svih revizora i revizorskih preduzeća kojima su, u skladu sa odredbama ovog zakona, izdate licence za vršenje revizije u Distriktu. Registar treba da sadrži ime i poslovnu adresu revizora i revizorske firme, ime profesionalnog tijela koje je revizoru izdalo certifikat i datum izdavanja licence. Registar revizora i revizorskih firmi treba da ima status javnog dokumenta.
- e) Lica i revizorske firme koje su licencirane u skladu sa zahtjevima Zakona o računovodstvu i reviziji BiH u Republici Srpskoj i Federaciji BiH, smatraju se kvalifikovanim za dobivanje odgovarajuće licence u Distriktu bez zahtjeva za dodatnim ispitima, obukom ili iskustvom u skladu s članom 10 ovog zakona. Takva lica ili preduzeća treba da se registruju kod Odjeljenja za budžet i finansije. U roku od šest mjeseci od dana stupanja na snagu ovog zakona, nosilac ranijeg zvanja računovođa i revizora u Republici Srpskoj i Federaciji BiH, stečenih u skladu sa propisima koji su se primjenjivali prije dana stupanja na snagu ovog zakona, mogu se pojaviti sa zahtjevom za slijedeća zvanja:
1. Računovodstveni tehničar – računovođa (ranije zvanje) u Republici Srpskoj – certifikovani računovodstveni tehničar (sadašnje zvanje);

2. Samostalni računovođa, ovlaštene računovođa i revizor (ranije zvanje) u Republici Srpskoj i Federaciji BiH – certifikovani računovođa (sadašnje zvanje);
3. Ovlaštene revizor (ranije zvanje) u Republici Srpskoj i Federaciji BiH – ovlaštene revizor (zadržava zvanje).

Na zahtjev lica s važećim ranijim zvanjem, profesionalno tijelo će, u skladu sa ovlaštenjima iz člana 5 stava 3 ovog zakona, u roku od šest (6) mjeseci od dana stupanja na snagu ovog zakona izdati certifikat za odgovarajuće zvanje, uz naplatu administrativne naknade čiji će iznos utvrditi profesionalno tijelo, na prijedlog Komisije, a u skladu s propisima Distrikta.

Lica sa ranijim zvanjem revizora, stiču zvanje ovlaštenog revizora samo ako u periodu od dvanaest (12) mjeseci od dana stupanja na snagu ovog zakona, odslušaju specijalni kurs kontinuirane profesionalne edukacije iz napredne revizije u trajanju od 40 časova i polože ispit iz tog kursa, u roku od godinu dana od dana stupanja na snagu ovog zakona. Specijalni kurs kontinuirane profesionalne edukacije kao i ispit organizuje profesionalno tijelo pod nadzorom i u skladu sa zahtjevima Komisije.

Član 7

Kvalifikacije računovođa i revizora

Novi kandidati za profesionalna zvanja iz člana 6 stava 1 ovog zakona moraju ispunjavati uslove u pogledu stručne spreme, praktičnog iskustva, obuke i testiranja koje utvrđuje Komisija. Ti uslovi treba da budu u skladu sa odgovarajućim standardima i smjericama IFACa.

Profesionalno tijelo izdaje certifikate uspješnim kandidatima, potvrđujući da su oni ispunili sve propisane uslove kako za punopravnog člana, tako i za odgovarajuće zvanje.

Sva lica iz računovodstvene profesije, uključujući i lica koja su stekla zvanja u skladu s članom 6 tačkom 3 ovog zakona, dužna su da pohađaju kontinuirano profesionalnu edukaciju u okviru kriterija koje utvrdi Komisija, a u trajanju od najmanje 120 sati u periodu od tri godine.

Licence koje su izdate prije stupanja na snagu ovog zakona, i dalje će biti priznate, pod uslovom da lica koja posjeduju takve licence dobiju novi certifikat o profesionalnom zvanju u skladu s članom 6 stavom 3 ovog zakona, te da ispune zahtjeve vezane za kontinuiranu profesionalnu edukaciju iz stava 2 ovog člana.

Član 8

Program za sticanje kvalifikacija i obuka

Za računovodstvenu profesiju u Distriktu primjenjuje se jedinstven program obuke i sticanje kvalifikacija na nivou Bosne i Hercegovine (u daljnjem tekstu: Program).

Program donosi Komisija u skladu sa IFAC-ovim standardima i smjernicama i implementira ga u saradnji s profesionalnim tijelima.

Lica koja po prvi put pristupaju računovodstvenoj profesiji, nakon stupanja na snagu ovog zakona, mogu steći propisana zvanja, samo ako ispunjavaju uslove odgovarajućeg Programa.

Pored uslova u pogledu testiranja i certifikacije, tijela koja izdaju certifikate i licence u Distriktu u skladu sa odredbama člana 6 ovog zakona osigurati će da kandidati ispunjavaju i uslove vezane za stručnu spremu i radno iskustvo za njihov nivo certifikacije.

Usluge obuke kandidata za računovodstvenu profesiju, u skladu s Programom, mogu pružiti sva preduzeća iz privatnog sektora, profesionalna tijela ili obrazovne ustanove BiH, koje ispunjavaju uslove koje utvrdi Komisija. Po završenoj obuci, organizator obuke izdaje polaznicima uvjerenje o prisustvovanju obuci, koje sadrži informacije o broju sati, sadržaju i programu pružene obuke. Pohađanje kurseva obuke za kandidate nije obavezno, ali je obavezno polaganje ispita za dobijanje certifikata.

Profesionalno tijelo je odgovorno za utvrđivanje i nadgledanje kontinuirane profesionalne edukacije svojih članova, u skladu s Međunarodnim obrazovnim standardima i članom 7 stavom 3 ovog zakona, te vođenje evidencije koja dokazuje da su zadovoljeni uslovi i kriteriji kontinuirane profesionalne edukacije koje je utvrdila Komisija.

Član 9

Priznavanje stranih kvalifikacija

Lica koja posjeduju certifikat izvan BiH mogu izvršiti nostrifikaciju stečenih kvalifikacija, nakon što ta lica dokažu da su ispunila IFAC-ove uslove edukacije u zemlji u kojoj su stekla

kvalifikaciju, kao i da ispunjavaju uslove stručne spreme, radnog iskustva i poznavanja pravne regulative i poreznog sistema Distrikta.

Nostrifikaciju stečenih kvalifikacija vršit će profesionalna tijela uz uslov i postupak koji propiše Komisija.

Član 10

Uzajamno priznavanje kvalifikacija u BiH

Svako lice kojem su certifikat ili licenca izdati u entitetima, saglasno zahtjevima Zakona BiH, s tim da su entiteti usvojili zakon ili regulativu kojom se obezbjeđuje identično priznavanje certifikata ili licenci izdatih u Distriktu, ima pravo da obavlja ove aktivnosti u Distriktu i od njega se neće zahtijevati nostrifikacija.

Obaveza podnošenja zahtjeva za registraciju revizora i revizorskih preduzeća iz člana 6 stava 2 tačke d ovog zakona primjenjuje se u slučaju revizora koji traže priznavanje u Distriktu u skladu sa ovim članom.

VI. RAČUNOVODSTVENA NAČELA I PRAVILA

Član 11

Knjigovodstvo

Sva lica iz člana 1 ovog zakona obavezna su da vode i čuvaju knjigovodstvene evidencije koje pružaju dovoljne, adekvatne i kompletne dokaze o njegovim transakcijama, u periodu ne kraćem od šest godina, ili duže ako to zahtijevaju porezni zakoni.

Za vođenje poslovnih knjiga lica iz člana 1 ovog zakona odgovoran je zakonski zastupnik.

Lica iz člana 1 ovog zakona dužna su obezbijediti da se:

- sastavljanje finansijskih izvještaja vrši na bazi podataka koji su dobijeni iz poslovnih knjiga,
- vođenje evidencija u zvaničnim poslovnim knjigama uz odgovarajuće adekvatno identifikovanje transakcija,
- evidentiraju samo postojeće vrijednosti,

- knjiženje obaveza i potraživanja vrši kod tačno identifikovanih poslovnih događaja,
- ne vrši kreiranje ili korištenje lažnih dokumenata,
- ne vrši namjerno uništavanje knjigovodstvenih evidencija ili dokumenata,
- ne potpisuju izvještaji koji nisu sačinjeni u skladu sa standardima i profesionalnom etikom,
- ne potpisuju finansijske izvještaje koje su «sastavila» lica koja ih nisu sačinila i vodila poslovne knjige.

Član 12

Računovodstvo

Standardi iz člana 3 ovog zakona primjenjuju se na lica iz člana 1 ovog zakona sa sjedištem u Distriktu.

Izuzetno od odredaba stava 1 ovog člana, svako pravno lice za koje se ne smatra da ima javnu odgovornost, treba da koriste računovodstvene standarde za mala i srednja preduzeća koje utvrdi Komisija, i da primjenjuje računovodstvene politike koje za rezultat imaju informacije, koje su:

- konzistentne sa IASB okvirom za izradu i prezentaciju finansijskih izvještaja,
- konzistentne sa IASB standardima koji se mogu primijeniti u pravnom licu,
- relevantne za korisnike pri donošenju ekonomskih odluka, i
- pouzdane u smislu da finansijski izvještaji:
 - a) vjerno pokazuju finansijski položaj, finansijsku uspješnost, kao i kretanje kapitala i tokove gotovine u preduzeću,
 - b) odražavaju ekonomsku suštinu transakcija, ostalih događaja i uslova, a ne samo njihovu pravnu formu,
 - c) da su neutralni, odnosno da su oslobođeni pristrasnosti,
 - d) da su jasni, i
 - e) da su kompletni u svim značajnim aspektima.

Prilikom procjenjivanja, od pravnog lica se zahtijeva da uzme u obzir sve IAS i IFRS kao i interpretacije koje je publikovao IASB, a prevela Komisija. Struktura i sadržaj finansijskih

izvještaja treba da budu u skladu sa zahtjevima IAS-1 – Presentacija finansijskih izvještaja.

Finansijski izvještaji za periode koji se završavaju 31. decembra, podnose se nadležnom organu Distrikta najkasnije do posljednjeg dana februara naredne godine, a potpisuje ih zakonski zastupnik.

Finansijske izvještaje podnose nadležnom organu lica iz člana 1 ovog zakona.

Format i prezentacija finansijskih izvještaja moraju biti u saglasnosti s načelima, standardima, zahtjevima i uputama iz člana 3 kao i stava 3 ovog člana. Profesionalno tijelo propisuje detaljan kontni plan, pod uslovom da je on u skladu sa zahtjevima ovog zakona.

Pravno lice je zakonski odgovorno za tačnost, kompletnost, istinitost, fer prezentaciju i pravovremeno podnošenje finansijskih izvještaja.

Zakonski zastupnik u pravnom licu će se zakonski zaštititi, ako zaposli računovođu, koji je kvalifikovan u skladu sa ovim zakonom, s ciljem da ispuni knjigovodstvene i računovodstvene zahtjeve koji stoje pred pravim licem, omogućavajući pri tome da, zajedno sa zakonskim zastupnikom, potpiše finansijske izvještaje i prihvati odgovornost za izradu finansijskih izvještaja na bazi svih neophodnih informacija koje obezbijedi pravno lice.

Zakonski zastupnik pravnog lica je dužan, na zahtjev računovođe, pružiti sve relevantne, tačne i potpune informacije neophodne za sačinjavanje finansijskih izvještaja.

Član 13

Revizija

Sva pravna lica koja imaju javnu odgovornost, dužna su da svoje finansijske izvještaje podvrgnu reviziji, u skladu sa standardima iz člana 3 ovog zakona.

Reviziju vrši revizorsko preduzeće, uz uslov da posjeduje važeću licencu za rad i zapošljava najmanje jedno lice koje posjeduje licencu ovlaštenog revizora, izdatu u skladu sa odredbama ovog zakona.

Revizorsko preduzeće može osnovati pojedinac ili grupa pojedinaca, uz uslov da lica koja

imaju većinsko pravo vlasništva budu kvalifikovana kao ovlašteni revizori, u skladu sa odredbama ovog zakona.

Gradonačelnik na prijedlog Odjeljenja za budžet i finansije će licencirati ovlaštene revizore i revizorska preduzeća i utvrditi uslove za izdavanje, obnavljanje i oduzimanje licenci koji će biti u skladu sa odredbama ovog zakona.

Gradonačelnik na prijedlog Odjeljenja za budžet i finansije donosi Pravilnik o reviziji koji definiše uslove sticanja i oduzimanja licenci za rad revizora i revizorskih preduzeća, način obezbjeđivanja kvaliteta revizije i revizorskih preduzeća i druga pitanja revizije .

VII. KAZNENE ODREDBE

Član 14

Novčanom kaznom od 10.000 do 17.000 KM kaznit će se za prekršaj pravno lice:

- ako ne vodi poslovne knjige - član 11 ovog zakona,
- ako se u poslovnim knjigama događaji utemeljuju na nevjerodostojnim dokumentima, suprotno Kodeksu i Standardima, član 3 Zakona,
- ako ne sačine i ne dostave finansijske izvještaje u skladu sa odredbama člana 12 ovog zakona i
- ako prihvate da finansijski izvještaj svojim potpisom ovjeri odgovarajući računovođa, koji nije i sastavio konkretni finansijski izvještaj.

Za radnje iz prethodnog stava ovog člana kaznit će se za prekršaj i odgovorno lice pravnog lica i preduzetnik novčanom kaznom od 1.000 KM do 5.000 KM.

VIII. PRIJELAZNE I ZAVRŠNE ODREDBE

Član 15

Sva lica koja su započela program obuke i certifikacije prije stupanja na snagu ovog zakona,

imaju pravo da taj program završe, u periodu od najviše jedne godine od dana stupanja na snagu ovog zakona.

Udruženje računovođa i revizora Distrikta smatra se profesionalnim tijelom u svrhu ovog zakona, pod uslovom da ispunjava uslove koje utvrdi Komisija.

Član 16

Gradonačelnik na prijedlog Odjeljenja za budžet i finansije formira savjet za računovodstvo i reviziju od najmanje pet članova.

Članove savjeta imenuje gradonačelnik na prijedlog Odjeljenja za budžet i finansije iz reda profesionalnog tijela, univerzitetskih profesora, predstavnika Odjeljenja za budžet i finansije i drugih priznatih institucija.

Savjet je savjetodavno tijelo i obavlja poslove koje mu gradonačelnik na prijedlog Odjeljenja za budžet i finansije povjeri.

Član 17

Propise iz člana 13 ovog zakona donosi gradonačelnik na prijedlog Odjeljenja za budžet i finansije u roku od 60 dana od dana stupanja na snagu ovog zakona.

Propise iz člana 5 stava 3 ovog zakona donosi profesionalno tijelo u roku od 90 dana od dana stupanja na snagu ovog zakona, uz saglasnost Komisije.

Član 18

Standardi iz člana 3 ovog zakona se primjenjuju na finansijske izvještaje za periode koji počinju od 01. 01. 2006. godine.

Član 19

Stupanjem na snagu ovog zakona prestaje da važi Zakon o računovodstvu ("Sl. glasnik Republike Srpske» brojevi: 18/99 i 62/02) i Zakon o računovodstvu i Zakon o reviziji ("Sl. novine Federacije BiH" brojevi: 2/95 i 12/98), na području Distrikta.

Član 20

Ovaj zakon stupa na snagu 8. (osmog) dana od dana objavljivanja u «Službenom glasniku Brčko distrikta BiH».

Bosna i Hercegovina
BRČKO DISTRIKT
BOSNE I HERCEGOVINE
SKUPŠTINA BRČKO DISTRIKTA

Broj: 0-02-022-369/05
Brčko, 22. decembar 2005. godine

Bosna i Hercegovina
BRČKO DISTRIKT
BOSNE I HERCEGOVINE
SKUPŠTINA BRČKO DISTRIKTA

PREDSJEDNIK
SKUPŠTINE BRČKO DISTRIKTA BiH
Prof. dr. Milan Tomić